

Indicacion serio cu tin companianan di aseguro cu lo cera nan porta

# COMPANIANAN DI ASEGURO NO TA PAPIA DI NAN NEGOSHI DI HIPOTECA!

ORANJESTAD(AAN)- E desaroynan cu a surgi entorno companianan di aseguro durante e ultimo simannan, ta causa gran preocupacion na Aruba. Informacionnan ta muestra cu for di aña pasa tin cierto companianan cu tabata busca un forma pa nan aumenta nan entrada. Na inicio di aña pasa ya tabata worde papiá di necesidad di

aumenta prima y tuma medidanan. Aparentemente e mercado chikito di Aruba no ta atractivo mas. Mientrastanto un aspecto no ta sali dilanti: esun mas importante. Kico lo bay pasa cu e negoshi di hipoteca, cu tambe ta parti di e mundo di companianan di aseguro?

Informantenan, cu bon conocimiento di e mundo di aseguro, a splica

DIARIO cu pa basta luna e companianan di aseguro tabata busca un forma pa nan aumenta nan ingreso. E medidanan di ultimo tempo mester worde mira den e luz di elimina e aseguronan cu tin mas riesgo pa cubertura (medico y di vehiculo) y aumenta esnan cu menos riesgo (incendio y aseguro di bida).

"Pa e aseguronan medico, AZV a duna un bon excusa. Pa loke ta trata esun di vehiculo, e formula ta masha facil. Accidente ta comun y no tin tanto ganashi. Sinembargo, un aseguro di bida no tin riesgo pasobra den hopi caso ta trata di un tipo di ahorro cu hende ta paga. E prima ta depende di edad. Aseguro contra incendio tambe ta contene poco riesgo, pasobra ora tin incendio significativo, ta noticia!" un informante a trece dilanti.

Mientras controversia pisa a surgi y publico ta urgi pa autoridad dicidi kico ta bay pasa, informenan

ta muestra cu tin por lo menos dos compania di aseguro na Aruba cu a baha nan operacion drasticamente. Uno di nan a duna personanan yega na e gerencia ya di conoce, cu nan lo bandona Aruba.

Sinembargo, tin dos aspecto cu no a haya atencion ainda. Na prome lugar, companianan di aseguro tambe tin aseguro internacional pa cubri nan. Kico a pasa cu e asunto aki? Preguntanan cu ta worde lanza.

Loke tin hopi hende preocupa tambe ta, cu companianan di aseguro no ta solamente negoshinan cu ta atende cu aseguro, pero institucionnan financiero cu tabata duna hipoteca. Nan tabata utiliza e capital cu nan negoshi ta saca for di clientenan, pa mescos cu banco, duna hipoteca na esnan cu ta cumpli cu nan exigencianan.

Mayoria di hipoteca cu ta worde ofreci dor di companianan di aseguro, ta

na personanan cu tin poco riesgo y den casonan di poco riesgo. Awor ta nace e pregunta grandi, kico ta bay pasa cu e parti aki di e companianan di aseguro. Nan ta bay pasa nan paketenan tambe pa otro compania?

Informantenan clave ta coincide cu autoridad mester cuminsa demostra mas interes pa loke ta pasa. "Ta trata aki di institucionnan financiero y no por laga e asuntonan aki sin control necesario ni pa publico resolve," a worde indica.

Mientras companianan di aseguro a pone hopi hende den situacionnan dificil, nan salida no por ta facil, manera a worde splica. Autoridad mester bay atende e asunto aki pasobra aunke pa e companianan di aseguro, Aruba ta un mercado demasiado chikito pa nan genera ganashi, comunidad a hinca hopi placa atrabez di añanan den e companianan aki cu awor mester duna cuenta y razon na publico!

## MUCHA A BAY SCHOOL CU ARMA

ORANJESTAD (AAN): Cos ta birando serio na Aruba! Algo cu hopi hende a teme cu nunca lo bay socede, ta cuminsa haya forza awor. Un mucha ta bay cu un arma di candela na school! Esaki a socede na San Nicolas.

E informe oficial ricibi di Polis ta duna lo siguiente:

Un Patruxa a worde para pa un chofer, y e ultimo a informa autoridad cu na altura di un school na San Nicolas tin un grupo di joven, y uno di e hobennan aki tin arma di candela den su poder.

Mesora Polis a reacciona riba e tip aki y a bay na e lugar indica. Enberdad tabata tin un grupo di joven y a haya un di e jovennan cu un cahita bashi.

Segun version di e joven cu el a caba di duna un mucha muher e arma. E alumno di 17 aña mientras tanto a entrega e arma na cabezante di school.

Investigacion ta indica cu e joven a ricibi e arma aki di un otro persona. Asina e arma a keda *circula* y finalmente a cay den man di e cabezante di school.

A resulta cu e arma ta di aire.

Mientras tanto Polis a pone mama di e joven na altura di e caso. Dilanti di e mama e

mucha a ricibi un scual formal.

Ultimo añanan, Aruba a mira via TV claramente ki sorto di tragedia, e hibamento di arma di candela na school por ocasiona. Ainda ta fresco den memoria, e tragedia na school Columbine na Colorado, y mucho mas.



TELEFONNAN  
DI DIARIO  
826747  
FAX  
828551